

2006
2006
2006

200 bantah keganasan Israel ke atas Palestin

BUKIT MERTAJAM 1 Mei — Sebanyak 200 ahli UMNO Bahagian Permatang Pauh hari ini mengadakan demonstrasi secara aman di Dewan UMNO di sini sebagai mengutuk tindakan kejam Israel ke atas umat Islam di Palestin.

Perhimpunan bermula pada pukul 9 pagi dan berakhir pada pukul 11 pagi itu diadakan sebagai prihatin dan simpati kepada umat Islam Palestin yang ditindas oleh rejim Israel pimpinan Ariel Sharon.

Mereka memasang kain sepanduk seperti 'Israel Pengganas Dunia', 'Selamatkan Bumi Palestin' dan 'Israel Setan Dunia'.

Sementara itu, Pengerusi Biro Latihan UMNO bahagian itu, Zakaria Awang berkata, pihaknya akan menyerahkan memorandum kepada Perdana Menteri, Datuk Seri Dr. Mahathir Mohamad sebagai simpati dengan nasib yang dihadapi oleh umat Islam Palestin.

Memorandum dua muka surat itu akan diserahkan kepada Perdana Menteri melalui Ketua UMNO Bahagian itu, Datuk Ahmad Saad.

Memorandum tersebut antara lain meminta Dr. Mahathir sebagai seorang pemimpin yang diiktiraf dan disanjung sebagai pemimpin dunia Islam untuk mengambil tindakan bagi mendesak Pertubuhan Bangsa-Bangsa Bersatu (PBB) agar melaksanakan arahan supaya tentera Israel meninggalkan kawasan yang diduduki di Palestin.

Selain menghantar tentera pengaman PBB termasuk dari Malaysia ke Palestin bagi membolehkan rakyat Palestin mengadakan pilihan raya dan membentuk kerajaan berdaulat dan merdeka.

Kata Zakaria, PBB juga perlu mengenakan sekatan antarabangsa bagi melumpuhkan ekonomi Israel.

Menurutnya, umat Islam dan pemimpin dunia Arab seharusnya bersatu dalam menjalankan sebarang aktiviti ekonomi tanpa perlu bergantung kepada sokongan Barat.